


CULTURA ARUBANO A DOMINA DEN CARNAVAL NA PLAYA



ORANJESTAD(AAN):E aña aki por bisa cu Carnaval di Aruba tabata den ambiente di cultura Arubano e aña aki, principalmente mirando e presentacion mahestuoso di Aruba di nos di John Flemming, y Ciglo 20 di Esso cu tur nan piezanan reflehando nos cultura, custumbenan, herencia, folklore y combina cu carnaval Arubano.

E parti historico di Shell cu su grupo Kingdom of the Sun, tambe Coastal cu su historia di Energia, tambe por menciona Santa Cruz cu su Royal Crown a contribui magnificamente na e belleza di carnaval cu Aruba a goza di dje.

Den parti comico, no por keda sin menciona Aiky's Crazy Team cu un biaha mas a pone publico na harimento cu nan presentacion di Hazaña di Kenneth Croes, e grupo Paraloco cu su circo y Crazy Boys cu nan machinenan di placa, y e individualnan Dr.Kennedy y Dr.Brand cu nan presentacion di Coke y AIDS.

E gruponan cu no por keda sin menciona pa nan belleza y cu a contribui na realce di e parada tabata e grupo di hospital Di Fiesta, tambe e grupo di Sun Resorts, bao di e nomber Simply Sunsational y e grupo di Holiday Inn Social Club y den fantasia e buniteza di Silvia Lourens, y di Moda 2000 di Knockout.

Den parti musical di parada na Playa, tur pero tur agrupacion musical a haci lo maximo, cu un resonando mas fuerte cu otro, pero cada un a duna nan contribucion excelente na exito di carnaval.

Tur caminda tabata tin expresionnan di elogio pa e parada cu Aruba a goza di dje ayera, un parada cu 18 grupo, cu a varia di duracion di 2 pa 2 ora y mey na diferente sitio di mira e parada, pero sigui no tabata den e lista di paradanan mas grandi di Aruba, ya cu

Aruba a yega di conoce parada 3 pa 4 ora.

E parada ayera sinembargo tabata hopi mas largo cu hopi hende a pensa cu e lo por ta y sumamente bunita ademas.

No por keda sin menciona den e parada di Playa tampoco e parti musical cu mescos cu na San Nicolas a sobresali cu tanto e agrupacionnan grandi como esnan chiquito dunando lo mihor di e sabor musical carnavalesco.

Si e aña aki tabata tin roadjam,

e competencia lo tabata fuerte entre e Indian di Tatoo cu Time y e Ki tin di Mighty Talent di Aruban Band.

E dos bandanan aki hunto cu PRIDE cu a bira e banda di aña tabata e atraccionnan grandi di ambiente cerca publico diadomingo.

E brassbandnan no por keda afo tampoco, y mester menciona e presentacion di Academy Brass, cu su show, su musica y e uniform bunita cu nan a exhibi.

